

11/05/1997

Gerila Katolik, penganas Kristian

ALKISAHNYA, Simposium antarabangsa mengenai Dunia Islam dan Kerjasama Global baru-baru ini menyarankan agar Malaysia pelopori usaha memperbaiki imej Islam melalui rangkaian media. Tujuannya nak tepis segala tindak-tanduk media Barat yang tak penat-penat memburukkan Islam pada kaca mata dunia.

Simposium itu rumus agar Malaysia mulakan usaha bentuk minda masyarakat dunia yang kini mendapat gambaran mengenai Islam hanya melalui media Barat yang kebanyakannya dikuasai bukan Islam.

Nampaknya, hampir semua peserta simposium berpendapat Malaysia mampu mempelopori negara lain bagi membetulkan imej Islam menerusi media. Sebabnya, kata mereka, negara ini ada kepakaran berbuat demikian.

Simposium itu dirasmikan oleh Perdana Menteri, Datuk Seri Dr Mahathir Mohamad dan disertai 150 peserta mewakili ahli politik, golongan korporat, pegawai kerajaan dan wartawan dari beberapa negara.

Teman tertarik dengan cadangan Dr Mahathir supaya media negara Islam turut menyebut 'penganas Kristian' atau 'penganas Katolik' ketika rujuk keganasan yang dilakukan oleh bukan Islam.

Menurut Perdana Menteri, langkah itu wajar kerana media Barat sering mengaitkan setiap keganasan yang dilakukan oleh orang Islam sebagai penganas Islam.

Tetapi teman fikir, kalau media negara Islam gunakan istilah sedemikian, akan bergoncanglah media elektronik dan cetak Barat.

Yang jelas, keganasan tiada kaitan dengan agama. Sebetulnya, yang berbuat ganas itu tidak beragama atau tidak mengikut peraturan beragama. Maka, untuk melabel penganas dengan agama anutannya tentulah tidak kena.

Barangkali, cara paling berkesan ialah memastikan negara Islam memperkukuhkan hubungan media agar berita yang diterima adalah daripada sumber atau agensi berita Islam sendiri.

Dalam hal ini, agensi berita negara Islam perlu mewujudkan kerjasama seperti yang disebut oleh Dr Mahathir sewaktu melawat Kuwait baru-baru ini. Menurutnya, agensi berita Malaysia boleh menjalin kerjasama dengan agensi berita Kuwait.

Dengan cara itu, barulah kita dapat berita daripada perspektif negara Islam dan ia tidak diputarbelitkan oleh media Barat, yang anti-Islam.

Bagaimanapun, memperkukuh rangkaian media di kalangan negara Islam saja tidak cukup kalau orang Islam sendiri tak tahu jaga kesucian agama itu. Contohnya, tindakan membunuh kanak-kanak Yahudi di Jordan baru-baru ini tidak membantu meningkatkan imej Islam.

(END)